

սը, որից վրէժ է խնդրում, եւս օտար ոմն չէ: 13 ամսեայ բանտարկութիւնը նոյն կարգի այլարանութիւն է, ինչպէս Չարմոքսի եռամեայ անհետացումը եւ ակնարկում է հողի տարեւոր հանդստին:

Ասել է, թէ Արէսին եւս յատուկ էր քնելու կամ մեռնելու եւ յառնելու կարողութիւնը: Կերամոս քաղաքում, որ Արէսի բանտարկութեան տեղն էր, պահուում էր նրա աճիւնը — ապացոյց, որ նա տեսել է մահ եւ կենդանացել (Mueller, Mythol, II 50):

Բոլոր այս դիտողութիւնները, որ այնպէս բնորոշ են Ատիս-Ադոնիսեան տիպարի աստուածութեան, թելադրում են ընդունել, որ Արէսն եւս սկզբնապէս, իր երիտասարդ օրերին, նոյն դասի աստուած է եղել: Քանի որ հայ էր-Արան էլ նման բնութիւն ունին, եւ երկրնքից ընկնելուց յետոյ շարունակել են երկրի վրայ պահել իրենց հինաւուրց նկարագրի ամենակարեւոր դիժը, ոչ մի արգելք չկայ մօտիկ արեւակցութիւն տեսնել էր եւ Արէսի մէջ:

Շատ նշանակալից է, որ երկուսն էլ աղերս ունին շան հետ: Շունը համարում էր Արէսի նուիրական կենդանի, որպէս պատերազմի դաշտի զիւակների անխուսափելի այցելու:

Յունաստանի մի քաղաքում շուն էին զոհարելու Շնիային, աւելի ճիշդ շան ձագ (Պաւսան, Գ. 14,9), իսկ Շնիայը նոյն Արէսի պատկերն է:

Արային կենդանացնողը Արայէզը կամ Աուլզն էր, որ յառաջ էր եկած շանից, ինչպէս վկայում է մատենագիր Եգնիկը:

Ձենք կարծում, որ հին հաւատալիքով բոլոր դիակները անխտիր մատչելի համարուէին շների լափին: Արէսի հակառակորդներին էր անշուշտ վիճակուած անարգ կուր լինել շներին: Նրանք, որ ընկնում էին կուռի դաշտում, վայելելով Արէսի հովանաւորութիւնը իրրեւ նրա կողմնակիցներ, արժանի պիտի լինէին այլ բախտի: Շները նրանց չէին լափում, այլ Արէսի հրամանով լիզում էին ընկածների վերքերը, բուժում այդ ընտրեալների խոցերը եւ վերակենդանացնում: Աուլզները աշպխտով քարի շներ են եւ դորժ ունին հերոսների, այսինքն՝ Արէսի սիրելիների հետ:

Նմանութիւնը աչքի է ընկնում եւ այլ կէտերում:

Ինչպէս ր սեմական Թամուզն ունէր իր համանուն թամուզ ամիսը տարուայ մէջ, երբ տօնուում էին նրա հանդէսները, այնպէս էլ Արէսին յատկացուած էր որոշ ամիս: Թեսասալիայում զարնան ամիսն էր, որ կոչւում էր Արէսոս, Բիւթանիայում՝ ամառուայ ամիսը: Բուսականութեան ոգին հակում ունէր դէպի զարնան մեղմ արեւը կամ դէպի լուսինը, որի շողերը այնքան բարերար էին համարւում բոյսերի համար, եւ կամ դէպի արեւը, որի կիզիչ ճառագայթները ե՛ւ կենսատու ե՛ւ կորստարեք էին նկատուում: Այս հետեւանքով տօները կատարւում էին զարնան եւ կամ ամառը:

Թւում է, որ հայ էր-Արան եւս իր յատուկ ամիսն է ունեցել, եւ թերեւս այնպիսի ծագում ունի հայ տօնացոյցի Արաց խորհրդաւոր ամիսը:

Ատիսի սրբազան ծաղիկն էր մանուշակը, բուսած նրա արիւնից: Ադոնիսն ընտրել էր պուտ ծաղիկը, (անեմոն): Հայերէնում յիշուում է արանց ծաղիկ, որ գուցէ ուղղելի է արաց, եւ կապ ունի Արայի անուան հետ, առայժմ զաղտնի:

Դիցարանական մերձաւորութիւնը յայտարարելուց յետոյ անտեղի չէ հարց դնել, արդեօք Արէս եւ էր-Արա անունների մէջ եւս ազգակցութիւն չկա՞յ:

Վիլիկեր գիտնականը, որը համարում էր Արէսին աստուած հրատապ արեւի, ինչպէս յիշեցինք վերեւ, հնարաւոր էր գտնում նաեւ ստուգարանօրէն կապել արէս՝ հայ արեւ բառի հետ:

Տակաւին վիճելի է, արդեօք արէս հինդուերոպական բառ է, թէ թրակեան ժառանգութիւն է նախնի բնակչութիւնից:

Արէսի պաշտամունքը տարածուած է եղել Թրակիայից մինչեւ Փոքր Ասիայի արեւելեան ծայրերը, ոչ միայն Մակեդոնիա, Թեսասալիա, Յունաստան, այլ եւ Փոքր Ասիայի երկիրները մանաւանդ Բիւթանիա, Պամփիլիա, Կարիա, մինչեւ Կողքիս եւ Հայաստան: Կիրասունի դէմ «Արէսի Կողքի», Արեախա քաղաքը եւ «Արէսի Պարտէզ», որ էր Կողքիսում ապացոյց են որ Արէսն ընտանի է եղել մերձակայ Պոնտոսի արեւերին: Արէսի պարտէզն այն